

[Paris], 7. Oktober 1550

An Johannes Oporinus

UB Basel, Fr. Gr. I 11, fol. 152r.

Steinmann Nr. 653.

Lit.: Steinmann S. 44.

S. P. D. Vtinam mihi liceret, Oporine humanissime, vtriusque nostrum commodo, viuere Basileae. sed ea est valetudo mea, vt verear, ne breui sit Lutetiae moriendum. Liberalitati autem tuae gratias ago maximas, nec de voluntate dubito. Secundam Demosthenis editionem officinae tuae reseruabo libens, modò tu cures, ne exemplar maximis meis laboribus emendatum, vel intercipiatur, si quando ad te mitti voles, vel perperam describatur. Editio Veneta mihi potius quam tibi fraudi erit. Non enim dubito, quin Itali multa vel de industria mutaturi sint et corrupturi, cum nostra etiam editio multa vitiosa habeat. Sed haec ferenda sunt. Plutarchi conuersionem Daniel, me, si per fata licuerit, breui discessuro, non suscipiet: cùm quod tam deprauato et graui auctori par esse non poterit, tum quod in erudiendis et cohercendis discipulis, plus satis erit occupatus. Libros tuos nondum accepimus, sed audiè vterque expectamus. Medici luctandum cum febri hectica, hoc est, lenta morte, mihi denunciant. hoc debo munificentiae patronorum meorum, qui me calcem bibere Gallicam voluerunt. Vale, ac meo nomine amicos ac familiam tuam saluta. Nonis Octobris Anno 1550.

Hiero[nymus] W[olfius] T[uus].

Libelli noui pauci hic sunt, quos in tua Bibliotheca non viderim. Qui autem sint, proximè (si vixero) scribam, aut fortassis ad te ipse afferam. Dionysium et Rami atque Talei libellos, te Xysto nostro misisse, atque Perionij physica accepisse spero. Vale raptim.